

[Augsburg], 4. Juli 1561

An Johannes Oporinus

UB Basel, Fr. Gr. I 11, fol. 245r.

Steinmann Nr. 735.

Lit.: Husner S. 156.

S. P. D. Cum viderem Carini aduentum frustra expectari, D. Ioannem Fuggerum denuo monendum existimauui. idque hodie feci, cum me, cui darem literas, nactum existimarem. Sed actum agere me intellexi, quod Carinus iam pleraque tecum transegerit. Itaque iam de Gregora securus vt emancipato Epictetum curandum video, ac ne hunc quidem, quod is etiam tuae fidei mandatus est et a me amandatus, exceptis 3. Arriani libris 2. 3. 4. quos adhuc mecum habeo, quod nemo fuit hactenus cui rectè committi possent. Mittam autem Deo volente Francofordiam vnà cum Graeco Simplicio et Arriano Veneto, si forte vsui tibi esse possint. Etsi ea quae a me correcta sunt, omnino rectius è meis singulorum capitum annotationibus petentur, atque adeò praestare videtur, si graeca etiam editurus es, te tuam editionem imitari, ne quid ego temere mutasse videar. Vale et per occasionem, quid de Epicteto statueris, ante nondinas significato. Etsi enim et astra et valetudo mihi hoc anno interitum minantur: tamen spero dum spiro, et ea etiam curo, quae fortasse nihil ad me pertinebunt. Iterum vale. 4. Nonas Iulij. 1561.

Hiero[nymus] Wolfius  
Tuus.

Scripsi Florentiam ad amicum quandam, vt mihi curet describendas Epicteti epistolas cum Simplicij commentarijs. Quid impetraturus sim, nescio, et vt impetrem, de mea conuersione dubito, si opus prolixius fuerit. Sed tamen quantum in me fuerit, opera dabitur, ne quid Epicteti quod extare scitur, desideretur. Hoc te scire volui, vt, si et ipse conatum meum iuuare possis, maiore cum fiducia rem aggrediamur. Vale, et, si videbitur, ea de re quam primum ad Petrum Victorium scribito.